

肥鄉縣志卷三十

名宦

民入社稷考績者最報循良撫字催科署考者師推慈惠口碑名播譜政事於歌謠心版恩銘升馨香於登豆爲能吏爲廉吏吏治共頌其澄清得經師得人師師儒式宣其教化京兆雖五日篆以攝而倉卒圖功有成待三年任以久而從容坐理愧芳蹤之難繼學焉未能撫遺澤之如春時乎難再高山期仰止務公忠以盡乃心殷鑒警將來勿貪墨以速官謗志名宦

漢 鮑子春爲列人令有明思才理問管輅曰聞君爲劉奉林卜婦亡日何其精妙試爲論其意義輅乃陳爻象之旨說變化之義規圓矩方無不合也子春自言吾少好談易又喜分書可謂盲者願視黑白聾者欲聽清濁勞而無功聽君語自視體中常爲憤憤者也

出三國志注

晉

張載字孟陽安平人博學能文章嘗著劍閣銘太守表上其文武帝命鑄之起家著作卽出爲肥鄉令長沙王又請爲記室見世方亂稱疾歸

按前志載趙安仁爲蒲縣令事府志未載蓋蒲縣漢改爲列人晉時蒲縣非本地今從之

肥鄉縣志

卷三十 名宦

一

唐

馮元淑安陽人武后時爲清漳令獎善去惡人稱神明與奴僕日一會馬日一秩所至不挈妻子俸餘以給貧乏或譏其近名元淑曰吾性也不爲苦中樂乃降璽書慰勞傳狀史館終禮部郎中

韋景駿京兆萬年人舉明經歷肥鄉令縣北瀕漳連年泛溢舊堤易壞景駿相地移南千步築堤水至堤址輒去其北燥爲腴田又維槽以梁其上而長橋功少費約河北饑躬出撫循民免流散及去邑人立石頌之復爲趙州長史道過肥鄉民喜進酒食有小兒亦在其中景駿曰方兒曹未生吾已去邑非有舊恩汝何故來對曰父老爲余言學廬館舍橋障皆公所築今幸親見公故來耳景駿爲留終日去

周

郭進深州人顯德中爲洺州團練使攝肥鄉令有善政郡民詣請立碑頌德詔左拾遺鄭起撰文賜之進嘗於城郭西植柳濠中種荷後益繁茂郡民見之有垂泣者此郭公所植也

宋

郭諮趙州平棘人舉進士仁宗時攝肥鄉令時田賦不平諮至閉閣數日以千步方由法四出量括遂得其數除無地之租四百家正無租之地百家收逋賦八十萬流民乃復遷殿中丞

金

李彥祥慶州人爲邑令修壁禦寇築隄防水有善政及民出舊志

劉敏行平州人天會三年除授中書郎遷肥鄉令歲大饑盜賊掠人爲食諸縣老弱入保郡城不敢耕種田畝荒蕪敏行白州借軍護縣民出耕日暮則閱民入城由是盜不敢犯耕稼滋殖轉高平令遷河北東路轉運使

明

錢朝鳳廬江進士吏治精明修學課士政聲赫然

李幹陽城人連遭水患民困輸將撫字催科曲盡其道偶以他故去詣府留者數千人

陳府上元進士政尚寬厚每以興學勸農爲首務有兄弟相訟者諭以孝弟輒感化

潘鑪六安州人政平訟簡輕刑省費歷任六年民無指摘

余炯樂平人事上臨下不阿不刻開河道以洩水患正佃戶以平徭役民立祠祀之

章滂富陽舉人以同知攝肥鄉篆簡刑罰恤疾苦毫無所私恩惠甚普

毛汝麟龍游進士以通判攝肥鄉篆尤多善政

王嘉言常熟進士公以御衆清以持己未嘗有疾言疾色加於民

張敏德萬安進士以左遷至下車卽詢民疾苦多方煦育吏有犯法者不少貸暇則勸士課業去後民立

肥鄉縣志

卷三十 名宦

二

祠學宮

李枻豐城進士行鄉約立保甲設義倉建社學杜鄙米隄口以防水患積穀萬石以備凶荒捐俸恤貧士絲毫不擾民民建祠繪像以祀之

陳明經光州進士案無留牘獄無重囚盜不入境士樂民安陞任去民爲立祠顏曰廉惠

彭應參光山進士性伉爽不作崖岸凡應行利害不待申請卽振舉事母尤以孝聞

廉靖鄱陽舉人歲大饑多方拯救極陳地方疾苦上臺感動題請蠲賑全活者數萬人錢糧不假吏胥手自收自解耗羨一無所取修文廟學宮葺李文靖公祠行鄉約法創修邑乘善政尤多

曹司宰宜興舉人革稅耗公費數千金舊歲買馬解邊官吏因以取利民重困之司宰以值給民聽其自市起解苦累頓免又創寒春院以栖貧民有投暮夜金者卻不受亦秘不言而勢宗巨族爲所欲爲則抗顏與之角尋陞刑部主事去民生祠于束關翟固兩處

萬廷播南昌進士清正方嚴崇文課士復射圃立社學修城隄建義倉于各鄉以備荒入覲留爲禮部主事

楊時晦沂水舉人壬戌秋歷任漳水浸城僑寓井堂寺又移寓郡城已而挽泥入縣誅茅理政題所居爲中流堂建漳神祠爲民祈禱天性洒落能文章不擾民亦不媚上居二年托疾去官

周汝弼用刑頗峻而能辦事漳水逼隄外汝弼悉心防守城賴以全後行取御史官至巡撫譚誠言淄川舉人愷悌和雅簿書之暇聚諸生講經書大義辨論精晰大有開發陞別駕去

曹亨忻州人家世邊鄙好談兵剪吏蠹革糧長出金令役代民天津納米豆因寇變製槍礮儲火藥備弓矢改建磚城未竟丁艱去所著有未竟 鳴登陣宜知傳世

侯君招商州舉人賦性簡朴居官恬靜後陞汾州知府李自成兵至不屈死

郝綱齊河進士體貌魁偉辦事明敏善議論能鼓舞人歲饑盜起東南綱選義勇以張聲勢賊不敢犯創建磚城計里分尺文物料各自備自辦不假手吏胥匝月而工告成又修養正書院以課士尋調永年取兵科給事中

李本固益都人以同知攝篆居官清廉愛民好士值歲旱虔誠步禱輒應仁心善政尸祝不忘

徐之登豐城人以同知攝篆廉明和厚有古君子風好講學從游者甚衆

盧芝茂杭州人以永年主簿攝篆不大聲色而能與百姓相安徵收耗羨標識存庫以待正令悉付之爲公用

梁自耕莆田人以廣平訓導攝篆以古學訓士子以善良訓鄉人日行文移外不干預一事訟願和息者聽民便迎送惟一馬一夫屏騶從不用曰吾不欲以視篆令人笑也

肥鄉縣志

卷三十 名宦

三

張鳳翔堂邑進士以推官攝篆年少精敏剔蠹興利號稱神明後官保定巡撫

范志懋虞城人以同知攝篆天性峭直論文講學終日不休遇善良則獎掖遇頑惡則斥辱刑不加逞人畏如神明拆封有羨金散諸生膏火供貧民綿絮絲毫不自私臨行出俸修啓聖祠不假民力

清

范大士如臯貢生問民疾苦興利除弊派正地丁徵收革社書使費免辦催里芝麻除草豆設義學善政多端

許國棫開原人時漳河衛決邑東南六十餘村垣屋皆墟逃亡殆盡國棫築長隄以防水患又墊解胡盧營等村三年逋賊俟民陸續償補積困獲蘇又設義學課來學弟子陞道州知州

王能任鍾祥貢生性忠厚外和內剛好詩能文邑城久爲漳水滄沒能任詳請修復衙署倉廩以次興建並築周圍城垣基址尋以憂去

萬申祺宜興人以試用攝篆值漳水暴漲平地高數尺邑西呂家堡等四十餘村田禾多滄沒申祺乘桴勸視詳請賑濟免錢糧又捐養廉銀以散給被災貧戶比去邑人遮道送之復爲立碑以紀其德

王建中錦縣進士精明強幹不畏權勢不容于謁事至立剖無留牘修建城垣衙署文廟及行臺營署以次告成區畫井井人咸稱其經濟

宋鏗黃岡貢生溫厚和平實心敷政虛懷下士接之者如坐春風又出示除人命盜案外一切詞訟俱令自拘以免差擾善政種種得大體焉

鄭大進揭陽進士潔己愛民政平訟理公餘之暇擇士之秀者二十餘人親督課之授以大家文法又因崇德書院傾圮改建于學宮前重膏火以恤寒士厚修脯以延名師相得歡然如家人父子調南皮陞冀州猶往來無問門下士刻其政績於碑後官直隸總督

戴芬華亭舉人文章饒經濟邑治雖復諸事草創難以經久芬請帑修城始甃以磚文廟學宮關帝廟以次修舉事就序而民不擾以其暇考課諸生鑑衡不爽八年之久善政多端

萬永福蒙自進士品行端謹堂事畢終日衣冠危坐歲旱步禱誠求不辭勞瘁額外窮民月給斗米捐金生息詳明各憲永遠遵行又刻勸民俚說頒發各村以移風俗而文章學問尤博大精深

鄭城錢塘進士詩賦精工文章鴻博汲引後進提倡宗風來學者延之署中集鳳樓供給而督課之永年威縣士子皆來就學先後成名者接踵邑人王文華王心一得其不傳之秘亦連擢科名罷官後掌教郡城文風爲之一變惟不嫻簿書錢穀卒以此致累云

程正階墊江舉人以同知攝篆嘉慶癸酉歲大旱民大饑詳請蠲免錢糧賑濟銀米盡心籌畫務期實惠及民又兼河南山東教匪倡亂連陷曹縣定陶滑縣長垣肥鄉距滑縣無三百里人心震動正階彈壓

肥鄉縣志

卷三十 名宦

四

鎮撫安堵如常邑當大廣衝途兵差絡繹正階在北關支應不令入城民得不擾權奇濟變足見一班查揆海甯舉人和平渾厚政簡刑清撫字催科曲盡其道文章淵雅詩古尤工與同寅諸紳士倡和往來爲一時韻事

縣丞

劉綸山西人理訟處事深服民心俸金外絲毫不染以不得竟其志告歸

主簿

劉喬松杞縣人博雅善議論常作俗論勸民勿訟人民咸化之

王來章靈石人樸質曲謹以淡約自處秋毫不取於民攝雞澤縣年餘士民詣闕保留者數千人竟左遷去

典史

黃詔南直人仁慈恬淡理訟不經笞人捕盜不重擾人奉批尤不忍入人罪以媚人每夜焚香自誓陞任餽饘一錢不受

朱萬瀛山西人推鞠公平不以苞苴易曲直每日官有崇卑民望無二若卑官急私橐竭民膏是之謂盜賊何以官爲後陞任去

師朝讓清澗人善騎射時值大荒盜賊蜂起師讓帥城中義勇直搗賊巢焚其柵壘擒其黠帥賊皆避之
所屬得以安堵

韓王錫富平人長厚而有應變之才事上接下皆得其歡心以陞任去
教職

陳一龍貴州人穎悟好學日以孝弟忠信爲訓督課多士寒暑不輟
盧經山西人耿介提躬諄諄勸諭不率教者面斥之士不敢阿以私

劉煥邠縣人性至孝母十七歲孀居色養至九十二歲無懈志每疾祈以身代抵肥旬月母以壽終哀毀
骨立聞者無不墮淚

詹道溥江西人博學宏識敦行尚志學者稱之

孔學易安邑人善屬文修學宮恤貧士不可干以私

趙登第南宮人課士先德行後文藝士之成器者稱頌不置焉

張夢周滄州人性格方嚴學問沈靜著有春秋集解

冉崑恩南人高懷曠度博雅肫至學者宗之攝縣篆捕捶手之黨置於法陞彭澤令去

李世英貴州舉人不諂不瀆課諸生文一字不苟後成爲進士

肥鄉縣志

卷三十 名宦

五

劉國會武陵人日與諸生衡文講藝惟恐不克盡職後遷商河令兵亂城破死之

清

蕭九奏衡水舉人康熙四十三年捐俸于啟聖祠後創建學署房十餘間並捐修學宮

趙時傑海城貢生天性耿介教令嚴明以正道率人諸生有過失正言厲色無所諱少年浮誇之氣對之

輒消雍正十年捐修學宮兼董修城工役

任克閻文安舉人工文章善書畫課士因材施教清奇濃淡各盡所長足徵學有淵源

柴士珍唐縣舉人性情洒落學問淵深尤工詩古文詞暇則與同寅及諸紳士賞花飲酒賦詩文彩風流
人皆傳爲美談